

M061B: Deutung der Meßgebräuche

0,1 Nv mac der man . als gerne eine ze ware .
0,2 uaren zov den ewigen genaden .
0,3 sam daz er uolge dem gesellen .
0,4 der in uerlaitet zov der helle .
0,5 der ime nimmer geseit .
0,6 die rehten warheit .
0,7 wan daz er ime uor gelichsenot .
0,8 er wil in leiten in den tot .
0,9 als ovch der uogelaere tovt .
0,10 der machet uz deme rise sinen hovt .
0,11 un- recchet uil lise .
0,12 den chloben uor deme rise .
0,13 mit harinen snovren .
0,14 er wiruet ovch da michel ungeuovre .
0,15 die ovch gesizzent an den chloben .
0,16 Die werdent uil dicche betrogen .
0,17 er ziuhet si hin in da .
0,18 un- enthovbetet si iesa .
0,19 sinen gratten er si git .
0,20 da uffē lit ein uberlit .
0,21 same uert ez umbe die alle .
0,22 die betrogen werdent zov der helle .
0,23 Do horte ich ovch wilē wol sagen .
0,24 daz scol man uns niht uerdagen .
0,25 Man sol div mergriezzer .
0,26 uur div swin niht giezzē .
0,27 si niezzent ir niht . daz ist war .
0,28 si behorgent si auer uil gar .
0,29 iht mer hilfet .
0,30 daz man den brideget
0,31 der dar umbe nine tovt .
0,32 wan daz er bespottet gotes wort .
0,33 der bezeichnen daz swin .
0,34 sin lon . movz . dester boser sin .
0,35 swer da sprichet daz govt .
0,36 un- div werch nine tovt .
0,37 dem sprichet unser herre .
0,38 uil ureisliche sere .

0,39 er reuellet harte .
0,40 mit sin selbes worten:
0,41 swer auer reit daz govt .
0,42 un- div werch da zov tovt .
0,43 unze an sine iungeste stunde .
0,44 der hat alle sine not uberwnden .
0,45 der hat alle sin arbeite .
0,46 wol geleitet .
0,47 er ist ovch ein uil salic man .
0,48 daz er ie an dise werlt bequam .
0,49 Nu ne mac ich uor minen sunden .
0,50 neheine govte rede chunden .
0,51 der heil- geist en ware
0,52 min scermare .
0,53 un- en wolte mich behovten .
0,54 uon den meintaten .
0,55 daz er mir durch sine govte .
0,56 gabe deumote .
0,57 in min herze
0,58 warhafte minne .
0,59 daz miniv wort waren
0,60 getriv . un- geware .
0,61 so mohte ich urlob haben
0,62 ze dem allerhersten man .
0,63 umbe eine rede govt .
0,64 die man uil dicche uor tovt .
0,65 umbe die uil misliche varwe .
0,66 da die briestere stent garwe .
0,67 uor dem altare .
0,68 wie dvrft uns des ware .
0,69 daz wir daz rehte behielten . umbe die uarwe .
0,70 waz si bezeichent so garwe .
0,71 des ist mir chunt ettewaz .
0,72 dvrch die waren minne wil ich iv sagen daz .
0,73 nu uerlihe iv christ der riche .
0,74 daz ir ez uernemet wislichen .
0,75 un- nemet ez uaste in iuern movt .
0,76 wan div rede wirt uil govt .
0,77 ez trifftet an die misse ettiwaz .
0,78 ir scult ez uernemen desten baz .
0,79 Ez ist umbe misse also gewant .
0,80 si machete unser herre selbe der . heilant .
0,81 mit sinne heil- sinne .
0,82 un- machete ovch dar inne .
0,83 sinen heren . lichenamen unde sin uil heil- plov .
0,84 uon div ist div misse uil govt .
0,85 un- sprichet ovch durch sin selbes munt
0,86 “swer zov der misse chumet .

0,87 mit andahtlichen movte .
0,88 si wirt ime wol ze govte .”
0,89 begriffet in des tages der tot .
0,90 div misse hilfet ime uzzer not .
0,91 so wir uur unseren lieben herren gan .
0,92 wider des hulden wir haben getan .
0,93 er ist uil gewaltec un- uil riche .
0,94 so ne sculn wir niht chomen hochuerteclichen .
0,95 wan er ist an dem willen .
0,96 er wil die hochuertigen alle uellen .
0,97 Durc unser ungezvhte .
0,98 bestet uns manec gesuhte .
0,99 wellen wir durch sinen willen .
0,100 daz unreht an uns niht stillen .
0,101 so wirt unser ettelicher dar geslagen
0,102 da er neheinen trost darf haben .
0,103 daz er immer mere .
0,104 gesehe sinen lieben herren .
0,105 Wellen wir die christenheit began .
0,106 so sculn wir gedultecheit un- deumovte haben .
0,107 daz hat uns uor gebildot .
0,108 der alwaltende got .
0,109 wie solten wir aber si began .
0,110 wan die ez an den bovchen sehent stan .
0,111 un- uil rehte sehent
0,112 wie ez quut . an dem bovche daz uor in da lit .
0,113 der neheiner keret dar an sinen movt .
0,114 daz ime si nuzze oder govt .
0,115 Die uns ze hirte sint gegeben .
0,116 die solten kuslichen leben .
0,117 ovch solten wir in uolgen nach .
0,118 der selben chunste daz ist war .
0,119 wan die hirte .
0,120 daz sint die ewarten .
0,121 un- heizzent die ewarten .
0,122 da uon daz si div kint bewarten .
0,123 da z der tovfte mit mangeme govten segene .
0,124 die da zov sint gegeben .
0,125 mit den heiligen gotes Worten .
0,126 si uertribent uo- uns den leiden widerwarten .
0,127 un- tovfent uns mit ulizze .
0,128 unser uarwe was . e . wizze .
0,129 si heizzent uns chomen lutterlich .
0,130 uur den heren chunec .
0,131 wir waren uon unseren sunden geborn .
0,132 unser uint . hat uns uerlorn .
0,133 wir waren gote uil lieb .
0,134 unser uint wesse unser niht .

0,135 e. daz ich uil arm man .
0,136 so maneger sunden began .
0,137 an den selben stunden .
0,138 heten si mich uunden .
0,139 si uarten min genote .
0,140 urov un- spate .
0,141 un- rieten mir . ie mer un- mere .
0,142 swaz so si mohten z ubele .
0,143 min herez oleuaz .
0,144 mit eittere uulten si daz .
0,145 si guzzen dar in . haz un- nit .
0,146 daz ist daz allerwirsiste licht .
0,147 ich en sprich ez umbe unsech alle niht .
0,148 ich bin uil dicche geuallen .
0,149 un- sint mir wol chunde .
0,150 mine uerchwnen .
0,151 iedoch moht ich geheilegot werden .
0,152 in dem salze der erde .
0,153 Die briestere heizzent sal terre .
0,154 beginnent si der rehten ewe .
0,155 so der briester wirt gewihet .
0,156 so ist er gote uil lieb .
0,157 so wil er z ware .
0,158 in haben z eimme gewinnare .
0,159 sinen uil heren amman .
0,160 wol in der si geren chan .
0,161 Ein chorter wirt ime danne beuolhen .
0,162 er sol sehen . daz im deheinez dar uz werde uerstoln
0,163 un- trage z allen stunden .
0,164 daz honec in dem munde .
0,165 un- gebe in salz sovzze .
0,166 so sovchent si sine uovzze .
0,167 un- obe sich einez dicche .
0,168 uon den anderen gescicche .
0,169 so habe er des lewen movt .
0,170 un- mache ez uil wnderengovt .
0,171 un- habe ez in siner hovte .
0,172 un- uille ez mit siner rovte .
0,173 unze ime daz ovge .
0,174 ei-weder naz werde .
0,175 uon den trehenen . oder uon dem blovte .
0,176 so ist er sin meister . govter .
0,177 da mit sol er si alle .
0,178 bringen zov dem stalle .
0,179 Der stal . bezeichent die christenheit .
0,180 wol in der dar inne bestet .
0,181 Den er denne niht mac bedwingen
0,182 noch zov den anderen bringen .

0,183 daz movz er gar lazzen uarn .
0,184 daz chumet nimmer in abrahames barn .
0,185 daz hat sich so gesunderot .
0,186 daz nimet der wolf durc not .
0,187 Die mislichen varwe .
0,188 seit iv niaman garwe .
0,189 da uon wil ich ein teil sagen .
0,190 ob ich es urlob habe .
0,191 Ez sint zwo uarwe wol getan .
0,192 die der briester an im sol haben .
0,193 im ist blatte gescaffen .
0,194 da mit zeichent man in z einem phaffen .
0,195 div blatte heizzet chrone .
0,196 die sol er behovten scone .
0,197 chrone ist ime niht gebare .
0,198 er ne si rihtare .
0,199 hat er briesterlichen movt .
0,200 so ist er rihtare govt .
0,201 daz er die lappen treit .
0,202 daz sol iv werden geseit .
0,203 Div lappe ist gescaffen .
0,204 ze manne dem phaffen .
0,205 div bezeichent die kuscheit .
0,206 div an im sol sin .
0,207 der zungen . in sinen munt .
0,208 dannan ime div govte rede wart chunt .
0,209 wolten wir die minnen .
0,210 in dem herzen dar inne .
0,211 wolten wir si tragen . un- braitten .
0,212 so mohten wir die lappen tragen .
0,213 un- mohten ez allez an uns haben .
0,214 In die chirchen sol er gan .
0,215 z alleruorderst sol er stan .
0,216 er stat z alleruorderost .
0,217 er ist unser leittere . un- unser trost .
0,218 wan er uns sol leitten .
0,219 uz disen arbeiten .
0,220 So nimet er denne in sine hant .
0,221 z alrerst einen champ .
0,222 er rihtet daz sin har .
0,223 ez sol ime ligen . daz ist war .
0,224 an daz har ist ez gezelt .
0,225 da ist ein anderz uz erwelt .
0,226 wir sculen hinder ime stan .
0,227 uil wole berihtet er uns daz ist war .
0,228 mit govter devmovte .
0,229 uor gote dem govten .
0,230 So heizzet er ime ein wazzer bringen .

0,231 so garwet er sich an daz singen .
0,232 als er daz wazzer enphahet .
0,233 un- er die hende getwahet .
0,234 so wisscet . er si sa
0,235 un- truchent sich da nach .
0,236 an daz wazzer ist ez gezelt .
0,237 ein anderez ist dar uz erwelt .
0,238 wir sculn hinder ime stan .
0,239 uil wol gedwagen . daz ist war .
0,240 uzzen un- innen .
0,241 unde obe an uns si decheiner slahte ubel .
0,242 bediv nit . un- haz .
0,243 abe uns wisscen wir daz .
0,244 So nimet er denne in sine hant .
0,245 ein uil herlich gewant .
0,246 daz heizzet ein humerale .
0,247 min trohtin dahte . waz daz ware .
0,248 da mite chumet ime der scate . des heiligen geistes .
0,249 uil wol bedarf er des .
0,250 den leit er almitten uf sinen hovbet .
0,251 niht uerrer ist ime erlovbet .
0,252 daz er div oren dar inne beleit .
0,253 daz sol iv werden geseit .
0,254 daz bezeichnet daz siniv oren .
0,255 nehein unreht sculen horen .
0,256 noch siniv ovgen dar gesehen .
0,257 da er decheines unrehtes . biiehe .
0,258 uon div sol man den briester niht twingen .
0,259 ze unrehten dingen .
0,260 un- ne mac er ez niht gemachen . govt .
0,261 so kere dan sinen movt .
0,262 Daz humerale ist uil here .
0,263 ez bezeichnet noch mere .
0,264 da sint ane zwene gurtele lange .
0,265 da mit er sich hat umbeuangen .
0,266 da mit chnupphet er zesamene .
0,267 die chussce . un- die tugent .
0,268 also sculen wir daz humerale tragen .
0,269 So sliufet er danne in ein gewant .
0,270 daz heizzet albe . un- ist lanc .
0,271 unde ist genennet wiz .
0,272 un- ist geworeht in allen uliz .
0,273 uzzen unt innan .
0,274 ist dehein ubel dar an getan .
0,275 daz ne sol deheine wis da bestan .
0,276 Div albe . bezeichnet den heil- gelovben .
0,277 der gelovbe ist auer uil govt .
0,278 der div govten werc tovt .

0,279 der sich tages unde . nahtes .
0,280 ulizzet gotes rehtes .
0,281 der ist wol gehelmet .
0,282 uaste gehalspget .
0,283 der mac wol mit rehte .
0,284 daz volwic durchuehten .
0,285 uolwic gelaisten .
0,286 wider den swarzen meister .
0,287 unde . mac ane wnden
0,288 wenden her umbe .
0,289 her widere keren .
0,290 zov simme lieben herren .
0,291 zov der himelisscen ierusalem .
0,292 wie mohte uns immer baz gescehen .
0,293 Der gurtel ist also getan .
0,294 der sol uns alle umbeuan .
0,295 der gurtel heizzet daz reht .
0,296 so garwet sich der gotes chneht .
0,297 minneten wir daz rehte .
0,298 wir hiezzen alle gotes chnehte .
0,299 Div stole ist lanc unde breit .
0,300 div umbe sinen hals get .
0,301 div bezeichent noch .
0,302 sante peters ioch .
0,303 do er dar in geweten was .
0,304 do er sanc un- las .
0,305 der noch da inne geweten stet .
0,306 wie salecliche- der uur sich get .
0,307 almitten in deme . wege .
0,308 daz er uns da mite zeiche- gebe .
0,309 Nu sculn wir hovtten alle .
0,310 daz wir dewederhalp uallen .
0,311 diu stole rot .
0,312 div bezeichenot .
0,313 den allerheristen win .
0,314 der in dem chelech sol sin
0,315 diu wizze daz prot .
0,316 da mit wir alle werden geuovrot .
0,317 Diu casula . div ime wole stet .
0,318 un- in allen beuahet .
0,319 da mite wirt bezeichenot . Fides . Spes . caritas .
0,320 div ie mit gote was .
0,321 die dri tugende
0,322 haftent zesamene .
0,323 un- machent state .
0,324 alle des mannes govttate .
0,325 also daz pflaster uil govt .
0,326 die steine an der mure tovt .

0,327 So nimet er den hantuanen .
0,328 so ist der herre wol gar .
0,329 so sint eruollot .
0,330 diu heil- gotes wort
0,331 Der hantuane bezeichent die gotes uart .
0,332 da div helle berovbet wart .
0,333 un- er die sine alle
0,334 loste uon der helle .
0,335 er hiez si uarn zov den ewigen genaden .
0,336 un- hiez uns nach ime komen . dare .
0,337 Ein bilde er uns uor trovc .
0,338 da nach ware uns ze uorscenne govt .
0,339 sin hovbet neicte er z ware
0,340 uor dem heil- altare .
0,341 da mite chunt er uns die govte .
0,342 daz got die deumovte .
0,343 an sich nam un- gie .
0,344 da er daz here crvce uant .
0,345 Vor dem gotes tiske er danne chniet .
0,346 siner sunden er begihet .
0,347 so zelt er sine schulde .
0,348 er sprichet “herre la mich haben dine hulde .
0,349 unde uerlich mir
0,350 daz ich movzze dienen dir .
0,351 daz tu an mir movzzest haben .
0,352 einen armen dienstman .
0,353 daz ich bote werde .
0,354 uon dem himele zov der erde .
0,355 un- ovch helfare si .
0,356 aller dirre menegi .”
0,357 so hat er urlobes gegert .
0,358 so ist got der in gewert .
0,359 Ein kirieleis . er danne singet .
0,360 die alten . e . er uns bringet .
0,361 als er ze dem anderen male singet .
0,362 die niwen . e . er uns bringet .
0,363 Die lezzen list er danne sa .
0,364 daz evangelium dar nach .
0,365 als er daz evangelium ane uahet .
0,366 der mit unzuhten da stat .
0,367 dem ware ze ware alse govt .
0,368 daz er nacchent uiele in eine glovt .
0,369 wan daz sint gotes wort .
0,370 unde sint an uns eruollot .
0,371 “Credo in unum .” er danne singet .
0,372 den gelovben er uns bringet .
0,373 den sol kunnen . wib . unde man .
0,374 der ie ze rehter tovfe kam .

0,375 daz er in spreche swa er si .
0,376 daz er da mite bewart si .
0,377 Ein bilde er uns denne tovt .
0,378 daz ware uns ze wizzenne govt .
0,379 daz er mit den armen gechrucet stat .
0,380 als die iuden unseren herren taten .
0,381 So der herre sprichet . “orate .”
0,382 so ne sculn wir niht entwellen mer .
0,383 wir suln biten starche .
0,384 umbe den gotes ewarten .
0,385 umbe die misse die er singet .
0,386 daz er si uure movzze bringen .
0,387 daz ez gote wol gezeme .
0,388 un- uns genadeclichen wege .
0,389 So der herre alsus .
0,390 singet . “sanctus . sanctus”
0,391 so gewinnet er nimmer mere .
0,392 so manegen helfare .
0,393 daz er daz geturre lan .
0,394 er ne movzze selbe daz here lob ane uan .
0,395 so helfent ime denne .
0,396 die heil- engele .
0,397 uile gewislichen singe- .
0,398 un- daz lob uur got bringen .
0,399 Dar nach neiget er
0,400 uur den alter sin hovbet .
0,401 da mite chundet er uns die not .
0,402 daz unser herre was an dem chruce . tot .
0,403 un- sin heil- geist gesegenot . unde gewihet
0,404 uon simme heil- lichenamen sciet .
0,405 So der gotes ewarte .
0,406 sprichet lute un- harte .
0,407 “Nobis quoque; peccatoribus .”
0,408 so chundet er uns alsus .
0,409 wie ein centurio sprac .
0,410 uil lute do er die martere sach .
0,411 do wrden ertpibe .
0,412 umbe alle die werlt
0,413 un- brachen die umbehangen .
0,414 die steine zerbrasten .
0,415 div greber . sich uf taten .
0,416 do erlasc div lichte .
0,417 div sunne . un- der mane .
0,418 wrden ir scin ane .
0,419 ez wart allez uerwandelot .
0,420 durc unsers herren christes tot .
0,421 Ein tovch ist scone . un- breit .
0,422 daz wirt uf den alter geleit .

0,423 got gesach den man .
0,424 der daz geren chan .
0,425 daz ist ein corporale .
0,426 un- bezeichnenot ze ware .
0,427 daz uil heil- gewant .
0,428 da man unsern herren in want .
0,429 do er uon dem chruce wart erhaben .
0,430 un- wart geleit zov dem grabe .
0,431 Daz man dar uf sezcet . un- leit .
0,432 daz ist urovde aller der christenheit .
0,433 Der chelech . der dar uffē stat .
0,434 der bezeichent daz gotes grab .
0,435 Div patene .
0,436 bezeichent . den stein .
0,437 der do wart geleit uf daz grab .
0,438 da unser herre inne lac .
0,439 In den chelech giuzzet er den win .
0,440 der scol allerherest sin .
0,441 daz er daz wazzer da zov tovt .
0,442 daz geurovt uns allen den movt .
0,443 daz got den willen habete .
0,444 daz er uns zov ime ladete .
0,445 div zwei werdent da gesegenot .
0,446 daz dritte . ist ein brot .
0,447 daz brichet er in driv .
0,448 heilic sint si elliv .
0,449 div zwei behaltet er sa
0,450 vil wole daz ist war .
0,451 Daz dritte scuizzet er in den win .
0,452 daz scol der here merot sin .
0,453 daz ist auer der merot . des unser herre gerete .
0,454 do er mit sinen iungeren merte .
0,455 Nu biten wir got den gouten .
0,456 daz er uns wol behovte .
0,457 un- sinen geist uil heren .
0,458 daz er uns movzze leren .
0,459 die geistlichen bihte . wan div ist uil gotv .
0,460 der si lutterlichen tovt .
0,461 der sich siner sunden bechlaget .
0,462 un- der niht uerdaget .
0,463 sinen ewarten .
0,464 so heilent si harte .
0,465 ube er die bovzze geleistet .
0,466 die ime sin meister beuilhet .
0,467 so mac er uil wole gan .
0,468 den gotes lichenamen enphahen .
0,469 unde wil er des niht tovn .
0,470 so kere dannan sinen movt .

0,471 oder er mac in also enphan .
0,472 alse iudas hat getan .
0,473 daz er wirt gestozzen .
0,474 zov iudas genozzen .
0,475 Uor deme gotes tisce er danne stet .
0,476 unze er daz sacrificium uf heuet .
0,477 so sprichet er iesa .
0,478 “per omnia secula .”
0,479 so sculen alle die sprechen “amen .”
0,480 die durc got dare chamen .
0,481 Der pater noster . ist ein gebete uil govt .
0,482 so wol in der in eruollot .
0,483 der gerichet niemmer niht .
0,484 des ime ze leide gescihet .
0,485 alle sine sculde .
0,486 uergit er durc gotes hulde .
0,487 der mac saleclichen leben .
0,488 dem werdent ovch sine sculde uergeben .
0,489 ze ware der des nine tovt .
0,490 der hat ime selben geulovchot .
0,491 An der misse geswiget er dri stunt .
0,492 da mite tovt er uns kunt .
0,493 die dri tage .
0,494 die unser herre lac in dem grabe .
0,495 nach dem dritten tage . erstovnt er .
0,496 un- erscein sinen iungeren sa .
0,497 in eimme gademe .
0,498 da si uor den iuden waren bespart .
0,499 do sprac der heil- christ .
0,500 “Pax uobis . miniv chint .”
0,501 Der briester sprichet noch also .
0,502 des sculn wir immer wesen uro .
0,503 so sol einer dare gahen .
0,504 den gotes uride enphahen .
0,505 unde sol under die anderen teilen die minne .
0,506 swa er der niht uindet .
0,507 der sceidet uil gewisse .
0,508 dannan an die misse .
0,509 so ist uns uil wol gescehen .
0,510 so sin wir uersovnet under einanderen .
0,511 so sculn wir da uil gezogenlichen stan .
0,512 unze urone segen werde getan .
0,513 so mugen wol urlop han .
0,514 un- urolichen dan gan .
0,515 so uasten un- uiren .
0,516 als man uns gebivtet .
0,517 unsers zehenden .
0,518 un- unsers almovsenes .

- 0,519 ioch des gebetes .
0,520 sculen wir ulizzeclichen phlegen .
0,521 Da mite sculn wir alle chomen .
0,522 zov der himelisscen Jerusalem .
0,523 zov den himelissen genaden .
0,524 dar helfe uns got . AmeN .